

17 Mac 2026

SIARAN MEDIA
Untuk Siaran Segera



7,440 KELUARGA ASNAF DI MALAYSIA DAN LUAR NEGARA TERIMA BANTUAN RAMADAN ISLAMIC RELIEF MALAYSIA

Ramadan adalah bulan yang penuh keberkatan, di mana umat Islam digalakkan untuk menggandakan ibadah serta memperbanyakkan amalan kebajikan termasuk bersedekah dan membantu mereka yang memerlukan.

Dalam kegembiraan menyambut bulan mulia ini, Islamic Relief Malaysia (IR Malaysia) terus memastikan golongan kurang berkemampuan turut merasai keberkatan Ramadan melalui pelbagai program bantuan Ramadan yang dilaksanakan di dalam dan luar negara.

Pada tahun ini, IR Malaysia telah menyalurkan bantuan kepada 5,070 keluarga di seluruh negara melalui beberapa inisiatif termasuk MySedekah Ramadan, Ramadhan Relief dan MySinggah Ramadan.

Setiap keluarga menerima pek makanan atau baucar tunai yang disesuaikan mengikut lokasi dan keperluan masing-masing, bagi memastikan bantuan yang diberikan benar-benar memberi manfaat kepada penerima.

Di peringkat antarabangsa pula, sebanyak 2,370 keluarga telah mendapat manfaat melalui bantuan Ramadan IR Malaysia setakat ini. Daripada jumlah tersebut, 500 keluarga di Gaza, Palestin menerima hidangan iftar, manakala 100 keluarga di Sudan, 770 keluarga di Indonesia dan 1,000 keluarga di Filipina menerima sumbangan pek makanan.

Ketua Pegawai Eksekutif IR Malaysia, Siti Fadilah Mohd Hood berkata, program bantuan Ramadan dilaksanakan oleh rangkaian Islamic Relief di seluruh dunia setiap tahun bagi membantu golongan rentan.

Dikeluarkan oleh: Komunikasi Strategik, Islamic Relief Malaysia.

Untuk keterangan lanjut, hubungi Sis Zafirah di 019-220 1788 atau e-mel ke Zafirah.Zahari@islamic-relief.org.my

“Kami berusaha memastikan komuniti yang memerlukan, sama ada di Malaysia mahupun di negara-negara yang terjejas akibat konflik dan krisis kemanusiaan, dapat menjalani ibadah Ramadan dengan bekalan keperluan asas yang mencukupi.

“Kami amat bersyukur atas sokongan penaja korporat dan penderma individu yang membolehkan kami menjangkau ribuan keluarga pada tahun ini.

“Bantuan ini bukan sahaja meringankan beban mereka, malah memberi semangat dan harapan untuk menyambut Ramadan dengan lebih tenang dan bermakna,” katanya.

Sementara itu, salah seorang penerima manfaat bantuan pek makanan Ramadan, Faridah, 70, dari Melaka berkata, sumbangan pek makanan yang diterimanya benar-benar memberi kelegaan dan membantu meringankan beban kehidupannya.

“Mak cik ni ibu tunggal. Dalam usia begini, mak cik masih lagi ambil upah buat kerja-kerja kampung macam bersihkan rumah orang dan cuci kereta di ‘car wash’.

“Upah yang dapat itulah mak cik guna untuk tampung belanja mak cik dan anak. Pernah juga beberapa hari tak ada orang panggil kerja, jadi mak cik hanya makan ikan bilis campur bawang dan cili saja untuk alas perut.

“Mak cik ucapkan banyak-banyak terima kasih. Mudah-mudahan orang yang beri bantuan ini, bersama keluarga mereka, sentiasa sihat dan dimurahkan rezeki untuk menunaikan haji dan umrah,” kongsiannya.

Pelaksanaan projek ini turut dibantu oleh para sukarelawan yang memainkan peranan penting dalam memastikan proses agihan bantuan berjalan lancar di lokasi-lokasi terlibat.

Seorang sukarelawan, Allysha, pelajar tahun dua Fakulti Ekonomi dan Pengurusan (FEP) dari Universiti Kebangsaan Malaysia (UKM) berkata, penglibatannya dalam program MySinggah Ramadan pada 7 Mac 2026 di Masjid Kariah Bangi merupakan pengalaman pertamanya menyertai program kemanusiaan.

“Hari ini saya berpeluang menziarahi empat buah rumah dan menyampaikan sumbangan. Keadaan setiap rumah yang saya kunjungi memang daif dan serba kekurangan.

“Pengalaman ini membuka mata dan memberi pengajaran kepada saya. Bersyukurlah dengan apa yang kita ada dan tolong orang yang kita perlu.

“Semoga bantuan yang diberikan sedikit sebanyak dapat meringankan beban mereka untuk berpuasa dan menyambut Aidilfitri,” katanya.

IR Malaysia merakamkan penghargaan kepada penaja-penaja termasuk Maybank Islamic Berhad (Maybank Islamic), Yayasan Sime Darby (YSD), Majlis Agama Islam Dan Adat Istiadat Melayu Perlis (MAIPs) dan Persatuan Bekas Pelajar MRSM Malaysia (ANSARA Malaysia), serta semua penyumbang kempen MySedekah Ramadan.

Sokongan mereka memainkan peranan penting dalam memastikan program bantuan ini dapat dilaksanakan dengan lancar dan memberi manfaat kepada lebih ramai keluarga yang memerlukan.

Kempen MySedekah Ramadan terus menjadi salah satu platform penting bagi masyarakat untuk bersama-sama menyebarkan kebaikan dan semangat kebersamaan sepanjang bulan Ramadan.

IR Malaysia komited untuk meneruskan usaha-usaha kemanusiaan ini bagi memastikan lebih ramai keluarga yang memerlukan terus mendapat sokongan, khususnya pada bulan yang penuh kemuliaan.

-TAMAT-

Mengenai Islamic Relief

Islamic Relief merupakan sebuah organisasi kemanusiaan antarabangsa yang ditubuhkan pada tahun 1984 sebagai tindak balas terhadap isu kebuluran di Afrika Timur. Ibu pejabat Islamic Relief terletak di Birmingham, United Kingdom. Islamic Relief beroperasi di lebih 40 buah negara dan telah membantu ratusan juta orang. Kini, Islamic Relief Worldwide merupakan antara salah satu badan amal dan pembangunan terbesar di dunia.

Mengenai Islamic Relief Malaysia

Islamic Relief Malaysia ditubuhkan pada 2004, bertujuan untuk meneruskan bantuan kemanusiaan Islamic Relief di Rantau Asia-Pasifik. Kini, Islamic Relief Malaysia berperanan sebagai pejabat penajaan dana dan pelaksana projek tempatan dan antarabangsa.

Maklumat lanjut mengenai Islamic Relief Malaysia boleh diperolehi di www.islamic-relief.org.my atau menghubungi talian +603-8926 3434.